

# **Paurongo Korinti Kpebung Yeneac Ngadekibi Ohoec**

<sup>1</sup> Anutungo Pauro negennenu Yesu Kristoac aposoro anduae. Ni nga tosonina Timoteo, nereng kibi yomoc Anutuac kpebung Korinti taonnu kecdae nga kpetiac areng sasawa Akaia bangecfu kecdae, ngenearu faidipe.

<sup>2</sup> Mannina Anutu nga Kebunina Yesu Kristo, yereac danggunuc nga ruaengo ngenearu febeso.

<sup>3</sup> Nenang Kebunina Yesu Kristo, yeac Anutu Manggac kenehebisina. Yeng Manggacnina amma ye nenanggac ubia manganeande. Ye Anutunina amma memeseri hafoangoc, imocac mingina.

<sup>4</sup> Nenang ebic sasawau kecni yeng meserinuande. Imocngo meefainunuu nenang yeac memeseri mema ngicngac ebicnginagoc yenearu kemma meseriyununide.

<sup>5</sup> Kristongo kpendzeng kpeec, nenang kpendzeng ifia ebirangoc kpeandimbe, imocac Anutungo Kristoac amma ebirangoc meserinuande.

<sup>6</sup> Ngeni memeseri megecde nga komoc kpegecdeac ebic tofohoandimbe amma meseringununideac Anutungo meserinuande. Ifi meseringununi ngeni ebicnginau serima

nanggecde. Ngeneac ebic nga neneac ebicngo siricngira mocgu andape.

<sup>7</sup> Nenang nenahafoc ebicnina medereandimbe, ifi isoc memeserinina medereemenide, imocac ngeneac negengyohoc mong mi mekecdimbe.

<sup>8</sup> Tosofocnina, Asia bangecfu nenearu ebic fingeru kpendzeng kpeing, ngeni imoc mi obohogeceac negemma yomoc edengunudimbe. Ebictoango memanunuma kucnina kpeu ubahereninau yofi negening, “Nenang homecac areng andimbe.”

<sup>9</sup> Anu Anutungo homecfunac ngicngac megboriyunuande, ye negensinggenideac yeng homecac arenunac mesinunuec. Nenang kucngo soha mi ande, ye imoc edzacnunuudeac ifi anec.

<sup>10</sup> Yeng homecac arenunac mesinunuec amma ye ngade ifingoc homecac arenunac mesinunuude amma mesinunubesande, neni yeac ifi negensinggema kecdimbe.

<sup>11</sup> Nga imoc fingerudeac ngeni nunumu meficnununubisia. Nga Anutungo danggunuha nemmeude, imoc fingeru ngicngac homac yeneng hemma neneac negemma Anutu dengeregecde.

<sup>12</sup> Ngicngac yeneac kicfu nga ngeneac kicfu amma Anutuac kicfu angammemenina gombunga nga kpetiac amma kongaha kecdimbe. Amma here negen negennina kpetiac bangec yomohai ifi kecma negenni engena angkecde. Nga uba eseaac negen negeng modacma botucnginau mi kecandimbe, kpac. Anutuac danggunucngo sing edzacnunu kpetiac kekec kpetofohoma kecandimbe.

<sup>13-14</sup> Wiac ohongemmeandimbe, ngeni imoc sawa osoma naric negentegecgede. Wiac oboc obohoa mong mi ohoandimbe.

Kebunina Yesu, yeac nasotoau ngeni neneac naric negensima sebingina meenggede nga neni ifi isocngoc ngeneac negensima sebinina meenide. Yofinenggac ngeni kopianecsac negenunudae nga wisic wisickeau ngeni hafoangoc ine negennunugecde.

<sup>15-16</sup> Ni imoc negensima yofi arenggeai, neng ngeneasuring hama ferecgema Makedonia bangecfu kembade. Kemma monggoc ngenearu dzigenema habade. Haba ngeni Yudaia bangecfu suenugecde. Ni ifi ambai dede waraima ngenearu hama dzigeneba monggoc neac amma ubangerec negembau.

<sup>17</sup> Ni imoc hanahema arenggema ngade eng kosa mi wayai. Ni “oc, oc” nga “kpac, kpac” naso socfungoc mi deanduae amma uba eseausing uana mi arenggeanduae.

<sup>18</sup> Foracngoc, Anutu yoacdedea modackecde nga neni ifi isoc yoac edengunuandimbe, ihai “Oc” nga “Kpac” naric mi kpeturanggenide.

<sup>19</sup> Amma ni nga Siriwano amma Timoteo, neng Yesu Kristo Anutuac Medac botucnginau dekperagingemmeing, yeng “Oc” nga “Kpac” mi kpeturanggeude, kpac. Yearu oc yoacsac fede.

<sup>20</sup> Anutungo wiac nemmeudeac deseriec, ye medahaac negensima “Oc” deec. Ifi deu Medahaac amma dedeseria fora fingerec nga fingeckenude. Fingeckenu Anutungo nenanggac amma kpac kuneng meude.

21-22 Yeng ngeni nga neni nenahafoc Kristoaru nanggenunuude. Nanggenunuude nenang ngade kurumenggac wiac menideac yeng yofinenggac Tiri Asuac keredokuyango nadzicnemmema ubahereninau faiec. Faiu imocngo Anutuac ma anude.

23 Anu Korinti amau mi hayai, imocac hania yofi, ni botucnginau demeting yoacsac debaiac imoc wama mi hayai. Dedena imoc Anutu yengenaoc negemma hepucna ande.

24 Nga neneng negen negensingnginaac garengtoa mi kecdimbe, kpac. Ngeni Kebu negensinggema serima nandae. Ifi namma ubangerec negenggecdeac ngeni nga neni nenahafoc ua mekecdimbe.

## 2

1 Negen negennango yofi negensidua, ni monggoc ubaebic meficgengemmebaiaac wama mi habade.

2 Neng hanahema ubaebic meficgengemmebadeu ngenearunac mongngo ubangerec naric mi meficgenende.

3 Nga ngenearu haba goa ngeneng ubangerec meficgenengandae, imocac negemba ngereede. Ngeni ubaebic meficgenembauac kibi mong ohongemmeai. Ni ngeneac yofi negengyombonggeduae, sogac sogai nearu fedeu ngeni sasawango sogaigecde.

4 Ni heresongotoagoc hoangngunuduae, imoc negenggecdeac kibi ohoai. Amma herenango dehou anenu ubaebic kuneng mema kiacma kibing-

ina ohongemmeaimoc, imocngo ebic ngemmebadeac mi ohoai, kpac.

<sup>5</sup> Ngic ubaebic meficgenemmeec, ye ubaebic nisac mi meficgenenec, kpac. Yeng ine ngeni sasawa ubaebic meficgengemmeec. Imocac homac mi debade, imocsac deduae.

<sup>6</sup> Nga ngeni homacngo ngic imoc kopocsihaac amma demeting bic ammigec, imocngo yofinenggac soha anu ifi monggoc mi ammbisia.

<sup>7</sup> Yeng ubamangang ebirangoc kecma kpac ambacac ngeni ine kopocsiha wama demeseri am-mima

<sup>8</sup> heresongongina edzahebisia, imoc seria dema edengunuduae.

<sup>9</sup> Ngeni sasawango yoacna tofohogecde me kpac, imoc negentegecbadeac kibina ohongemmeai.

<sup>10</sup> Nga ngeni ngic monggac kopocsic wagecdeu neng ifingoc yeac kopocsic wabade. Nga kopocsic mong wabadeu imoc Kristoac kpacfu ngenec amma waduae.

<sup>11</sup> Satanggac faitobannu manunubacac ifi ambisia. Yeng faitobang arenggeande, imocac sirihaac mi obohodimbe.

<sup>12</sup> Anu Troa taonnu hama Kristoac siduc gombung edekpou ayemmebadeac Kebungo singa bic mesarinenec.

<sup>13</sup> Hama Tito hoforaiac ongaasunango ruae mi meficgeu ine dekenec amma faiyunuma Makedonia bangecfu kenai.

<sup>14</sup> Anu Kristogoc kpeketahema kecni Anutungo nasosoc yeac firanggac arennu hesicnunuude. Hesicnunu guruamasoc kenni Yesuac siducngo

homung kerengagoc amma imocngo uaninau fin-  
gecma kengkefude.

<sup>15-16</sup> Kristogoc kpeketahema kecni sebihomunnina gombunga Anutuaru enude. Ngicngac komoc kpegecde, yeneac botucfu imocngo homuna gombunga kekehagoc amma kekec yemmeude. Nga hofeac sing modacandae, imoc yeneac botucfu ine hoachomung kpedzini imocngo homec yemmeude. Tembucnina ua imoc naric mi mebing, kpac. Kristogoc kpeketahema kecni ifi fingerude.

<sup>17</sup> Ngic goa yeni hiedzotoa kirecgeyemmeudeac negemma Anutuac yoac deandae. Yeni isoc mi angkecdimbe, kpac. Anutungo suenunuu yeac negensima Kristogoc kpeketahema kecni ubaherenina dindingac femanu Anutuac yoac dekpera-  
giandimbe.

### 3

<sup>1</sup> Neni uaninaac hania monggoc edengununide me kibi mong nanggenunuudeac ohoma ngenearu mehani obohode, ngeni imoc bic negenda.

<sup>2</sup> Ngeni ngenaocngoc neneac kibi andae. Nga Kristongo kibi imoc ubaherenina manau bic ohou ngicngac sasawa yeneng kibi imoc osonegeng angkecdae.

<sup>3</sup> Anu neni ngenearu ua meni ngeneng Kristoac kibi andae, imoc didiu bic fingectegerec. Amma kibi imoc pengdokuyango mi oho ohoya, kpac. Anutu kekehagoc yeac Asungo ine kibi imoc ohoc. Nga ye imoc tafebisic hocngo memea,

imohai mi ohoec, kpac. Imoc ine ngicac sebifusiac tafeu ngicngac ubaherenginau oho ohoya fede.

<sup>4</sup> Yesugoc kpeketahema kecma yofi negensid-imbe, Anutungo uaya nanggema garenggeude.

<sup>5</sup> Nga neni yofi negemma naric mi debisina, “Neni naric nenaoc ua imoc menideacsoc andimbe.” kpac. Ua menideac kuc, imoc Anutuarunac hanemmekecde.

<sup>6</sup> Yeng meserinunuu dzadzahac gboriaac kingangkpekpe kecnideac. Imoc dzadzahac Mosengo ohoec, ifi isoc kpac. Asungo dzadzahac imoc ubahereninau ohoec. Amma dedeseriyoacngo yoacfu fainunuu homenide nga Asungo ine kekec nemmeude.

<sup>7</sup> Anutungo dedeseriyoac imocac kibi hocfu ohoec. Yoac imocngo homec meficgenemmeec amma sifu kuc nga kibikperagiagoc haec. Moseac kicmesuya kperagiu Israe ngicngac yeni kicmesuyau kic figecdeac osigec. Ngade ine kuha maec.

<sup>8</sup> Moseac ua areng imoc kuc kibikperagigoc hanahema kuha maecac amma Tiri Asuac ua arenggac kuc nga kibikperagiango wiac imoc monggoc feraheude.

<sup>9</sup> Ua arengngo yoacfu fainunuande, imocngo kuc kibikperagiagoc anecac amma ua areng sing dindingac meficgenemmeude, imocac kuc kibikperagiango monggoc ferahade.

<sup>10</sup> Ifi anu kuc kibikperagia engenatoa imocngo kuc kibikperagia warac feec yeac kuc memaude.

<sup>11</sup> Wiac kuc kibikperagiagoc haec, imocac kuha bic mama kpac anec, fora. Nga wiac feengkefude, imocac kuc kperagiango wiac ifia monggoc ferahaude.

<sup>12</sup> Anu wiac feengkefude, imoc negensima kengeha kpac ua mekecdimbe.

<sup>13</sup> Moseac kicmesuyaac kperagia, imocac kuha mamanu ye yofi negemma kicmesuya kporucngo kperahaec, “Israe ngicngac faka imoc mi hem-bisia.” Nga neneng ine ifi mi angandimbe, kpac.

<sup>14</sup> Yeneac negen negeng ine fonggou ifi anec. Nga yofinenggac kpou kpoufocngina dzadzahac eseaac yoc osoyemmeandae, imohai kporuc imocngangoc seria namma negen negengngina hedzickekecede. Anu ngic yeni Kristogoc kpeketa-hegecdeu kporuc imoc meicmeickea anude.

<sup>15</sup> Oc, yofinenggac kpou kpoufocngina Moseac yoc osoyemmegec kporuc imoc ubaherengina hedzickekecede.

<sup>16</sup> Nga ngic mong ye ubamereng amma Kebuaru kenudeu kporuc imoc meickema kpac anude.

<sup>17</sup> Kebu ye Asu amma Kebuac Asungo ngicfu kefu ngic ye witiha kpac kefude.

<sup>18</sup> Nga nenang sasawa kicmesunina kperaha kpac kecni Kebuac kuc kibikperagingo kicninau wiking isoc heimerenu yeac onga annide. Amma yeac kperagingo kekecninau yadima saheude. Kebu ye Asu amma Asungo uaya meu faka imoc fingerude.

## 4

<sup>1</sup> Anutungo wosoefahaac amma ua areng ohoaimoc, imoc nemmeec. Imocac amma kucmama mi angandimbe.

<sup>2</sup> Neni faka sufu sufu gameagoc sasawa bic wadacma dekerec naric mi angemmenide. Amma Anutuac yoc mereng kpereng amma naric mi



edengununide, kpac. Yoac fora didiu fingectegerudeac neni Anutuac kicfu yoara deni ngicngac sasawa here negen negengnginau naric ireckegecde.

<sup>3</sup> Nga siduc gombang deandimbe, imoc goa yenearu sufu sufu anude isoc. Ngicngac imoc yeni hofeac sinnu kemegecde, yenearu ifia fingerude.

<sup>4</sup> Kristo ye Anutuac onga nga yeac siric. Anu bangec yomocac nemu Satang, ye ngicngac mekundungkpeyunuu negen negensingngina kpac kecdae nga yeni Kristoac siduc gombangngongicngac mekperagiyemmeande, imoc mi henggecdeac kicpisc anggec.

<sup>5</sup> Kebu Yesu Kristo dekperaginide nga neni nenang mi dekperagiemeandimbe, kpac. Yesuac amma ngeneac kingangkpekke amma kecdimbe.

<sup>6</sup> Anutungo yofi deec,  
 “Kundununac kperagi fingeacna.” (*Fingec fingeac 1:3*)

Anutu yennoc ubaherenina mekperagikecde. Amma Kristo ye Anutuac kuc nga kibikperagia negentegecde, negen negentegec imocngo yeac kicmesuyaunac hama ubaherenina mekperagiude.

<sup>7</sup> Nenang enang isoc kecdimbe. Anutuac kibikperagia imocac kuha engena nga imoc dzofinac isoc ubahereninau faifaia fede. Dzofinactoa imoc yearunac haande nga ngicngac yeni imoc negentegecgecdeac yeng imoc ubahereninaac enannu faiec.

<sup>8</sup> Anu ebic hania haniango noboc noboc igocnunuande, imocngo ine mi dzegenunuude. Nga faka nga uaninaac gagabuma mi ukuni kpeande.

<sup>9</sup> Ngic yeneng kporacnununumagec Kebungo naric mi wanunuude. Yeni nunugec manunuu sifu mi kpac angandimbe.

<sup>10</sup> Yesuac kekec sebininau fingectegerudeac amma neni Yesuac homec sebininau tofohoma mekecdimbe.

<sup>11</sup> Yesuac kekecngo bangecsebininau fingectegerudeac ngicngac yeni nasosoc Yesuac amma sebinina homecac arennu faigece.

<sup>12</sup> Nga homec ye nenearu ua ifi mekecmanu kekecngo ngenearu ifingoc uaya mekefude.

<sup>13</sup> Yoac mong yofi oho ohoya fede,

“Ni negen negensinggoc kefaiac ebicnasou ifingoc negensinggumangoc kefai, imocac amma deduae.” *(Mitiyegec 116:10)*

Anu neni ifingoc negen negensinggac Asugoc kecma negensinggema yoac dekecdimbe.

<sup>14</sup> Anutungo Kebu Yesu homecfunac megboriec, yennoc Yesugoc homecfunac megborinunuma neni nga ngeni nenahafoc menunuma yengena hoannu fainunuu nannide, imoc negendimbe.

<sup>15</sup> Wiac sasawa imoc ngeneac amma fingerude. Nocac Anutuac danggunucngo torokpeu torokpe ngicngac yenearu hakefu ngicngac homac yeneng ubangerec ebirangoc negemma Anutu dengeregece.

<sup>16</sup> Sebininango kucmama meficgema kpac ambeso anu Anutungo sifu ubaherenina wenacsoc heigborinemmekecde, imocac nenang ubanina mi maude.

<sup>17</sup> Anu ebic nga kpendzeng kpeandimbe, imoc naso wegenanecsac feude, imocngo wiac kuneng

mi ande. Imocngo ine sinnina meu kekecseriac kuc nga kibikperagia engenatoa menide.

<sup>18</sup> Wiac kicngo hengandimbe, imoc nasoya hau kpac ambesande. Nga wiac kicngo mi hehena, imocngo fefeseri feude. Imocac wiac kicngo mi hehena, imohaigeng kicnina fima kecdimbe nga wiac kicngo hengandimbe imoc wanide.

## 5

<sup>1</sup> Neni yofi negendimbe, sebininaac bedzo yomoc, imoc bangecfu bedzoac onga ande. Amma imoc dzamema barackeu Anutungo amanina mong maringo mi memea kurumennu bic fainemmeec. Ama imocngo fefeseri amma feengkefude.

<sup>2</sup> Ifi anu, nenang sebibedzonina\* yomohai kecmina asoringa anemmeu kurumenggac ama heinemmeu kemeudeac songotoanina ande.

<sup>3</sup> Yeng imoc heinemmeu kemeudeu senggang mi nannide.

<sup>4</sup> Nga nenang bedzo yomohai kecma asoringa ebirangoc anemmeu imoc hesinideac mi anemmeude. Kekecngo ine homec gbokoudeac negemma ye sebi gboria witiau heiu kemeudeac anemmeude.

<sup>5</sup> Anutu yengenaoc kekec imoc menideac mengerenunuec, yennoc Tiri Asu nemmeu imocngo dzadzahacac dzicnina.

<sup>6</sup> Nga sebingo amanina anu ihai kuric kecma Kebugoc araing kecdimbe, nenang ifi negemma ubayohoc mi kecnide.

---

\* **5:2:** Ye sebinina negenu bedzo isoc ande, nasohere mi kefudeac.

<sup>7</sup> Nenang yofinenggac yoara negensinggema fora kicngo mi hengandimbe.

<sup>8</sup> Ifi kecma negengyohoha kpac kecnide. Nga singa febac dede neni bangecsebinina yomoc naric wama Kebuaru kemma amanina gboriau kecbing.

<sup>9</sup> Imocac yofi negenseridimbe, edi yegoc me yei kecni ubea ngereeudeac nenang enara tofohobisina.

<sup>10</sup> Nenang sasawa Kristoac ising isinggac tatahau kembisina. Kenni yeng naso imohai faka nga angammemenina gombunga nga mangana angkefing, imocac turunga kpounemmeude.

<sup>11</sup> Kebu ye damuyagoc, neni imoc negendimbeac kengecunude. Imocac amma ngicngac kpedziyununideac uatoa mekecdimbe. Nga Anutungo hanianina didiu bic faima hemma negende. Anu ni negemba ngeni ifingoc here negen negengnginau hanianina naric ireckebisia.

<sup>12</sup> Ngeni heitainunugecdeac uaninaac hania monggoc dema mi edengununide. Goa yeni hama sebingina meenggec ubaherenginango fora mi meficgeande. Ngic ifia hagec yofi naric edeyunubisia, “Neni Pauro nga Timoteo amma Siriwano yeneac negenni engena ande.”

<sup>13</sup> Ngeni ubasufu denemmegecdeu imoc neni Anutuac negemma andimbe. Nga negen negentegecgoc kecnideu imoc ngeneac negemma angkecdimbe.

<sup>14</sup> Ngic mocgungo ngicngac sasawa donina mema homeec. Nga neni sing imohaingoc sawango homedaring, ifi negendimbe. Imo-

cac amma Kristo heresongogoc hoanggema ua mekecdimbe.

<sup>15</sup> Kristongo ngicngac sasawa neneac amma homeec. Nga ngicngac kecdimbe, neni nenang-gac kekecacsac negemma monggoc mi kecbisina, kpac. Nenang Kebuac amma kecbisina, no-cac yeng nenanggac amma homeu Anutungo ye monggoc megboriu yarec.

<sup>16</sup> Imocac amma yofinenggac namma emma uba esea faka wama ngicngac yeneac negenni mamea mi ambeso. Amma warac Yesuac ngicte-hec isoc negening, yofinenggac ine kpac.

<sup>17</sup> Mong ye Kristoaru kpeketahama kefudeu Anutungo ye meficgeu gboria fingecma kefude. Kekec eseaac wiac imoc bic kpac anec nga kekec gboria imocngo fingecma feudenoc.

<sup>18</sup> Imoc sasawa Anutuarunac hakecde. Kristongo turunnina kpouu Anutungo uba mocguac faka nemmeu yegoc ruae fingerec. Fingeru ru-aeyoac dekperaginideac ua nemmeec.

<sup>19</sup> Anutungo Kristoaru kecma bangectoa bangec yegoc uba mocgu anggecdeac faka meec. Nga ngicngac nenang yoara kpema kecminangoc yeng kopocsicnina waec. Wama ngicngac yegoc uba mocgu anggecdeac ubahereninau yoac imocnoc faiu dekperagiyemmeandimbe.

<sup>20</sup> Nenang Kristoac enacdede nga Anutungo enacnina meefaiu yeac desambicyoac Kristoac amma ngicngac yofi edeyunuandimbe, “Ngeni Anutugoc uba mocgu anggecdeac yegoc ruae meficgebisia.”

<sup>21</sup> Kristo ye yengena kopocsiha kpac. Amma yeng donina mema kopocsicac ebicfu enec. Enu

nenang yegoc kpeketahema Anutuac ngicngac dindingac amma kecdimbe.

## 6

<sup>1</sup> Neni nenahafoc ua mekecdimbeac yofi serima edengunudimbe, “Ngeni Anutuac wosoefac bic megec, imoc eng kpedzonggebauac amma eden-gunudimbe.”

<sup>2</sup> Anutungo imocac yofi deec,  
 “Nasokereng anu ni kedzac kpema nunumuga negenai. Amma ni noc nasou ebicfunac mesigubadeac imocac isinggema meficguai.” *(Yesaia 49:8)*

Negenggec, yagucngoc nasokereng ande nga ye yofinenggac ebicfunac mesinunuude.

<sup>3</sup> Anu ye ua nemmeu ngicngac yeneng imoc demanganema ubanginango wabauac neni fakanina garenggeandimbe.

<sup>4</sup> Nga Anutuac kingangkpekpefora kecdimbe, imoc fakanina sasawau ngicngac edzacyunuma kpendzenu seriyombonggema kecandimbe. Amma yare witiau kecma ebic hania hania meficgema ubanina kuha mau kecandimbe.

<sup>5</sup> Ngic yeni dzikacngo nunuandae nga witicamau fainunuandae amma neneac amma dzomugerec meficgeandae. Neni uatoa mekecma gaugbori kecma hereninaac homeandimbe.

<sup>6</sup> Neni Tiri Asugoc kpeketahema seria namma negen negentegecgoc kecma faka kongahau nanggeemema ngicngac ogofocnina yeneac ubanina manganeu heresongo forau hoangyununide.

<sup>7</sup> Anutuac kuc mekecma yocac fora dema kekec dindingac, imocngo dzikacac wiacnina angkecde nga imoc mari foininau\* mema ua meandimbe nga kanau† mema garengemeandimbe, faka imoc sasawa amma Anutuac kingangkpekpe kecdimbe.

<sup>8</sup> Ngicngac goa yeneng ewehei anemmeandae nga goa yeneng demanganenunugecde. Goa yeneng enacfu faifai anemmeandae nga goa yeneng dengerenunugecde. Neni yocac fora deni goa yeneng imocac negemma ikoc degecde.

<sup>9</sup> Ngicngac homacngo wanunuandae amma sifu negennunuandae. Neni homebeso amma sifu gbori kecdimbe. Ngic yeneng dzikacngo nunugec sifu ine mi homeandimbe.

<sup>10</sup> Nga ubahodung negemma sifu nasosoc so-gaima kecdimbe. Neni makpekpea kecma sifu ngicngac meficyununi yeni kurumenggac fin-actogoc anggecde. Wiacnina kpac yombong kecma sifu wiacnina sasawa fenemme. Ifi isoc kecni ngicngac yeneng hanianina naric negentegecgecde.

<sup>11</sup> Ngicngac Korinti taonnu kecdae, ngenec negemma sing dindingac denide. Amma ngenec ubaherenina kuneng yombong fede.

<sup>12</sup> Nga ngeneng neneac negemma herengina dzegegec neneng sifu ngenec amma ubaherenina mi dzegecde, kpac.

<sup>13</sup> Nambaracfozna, ni yaguc ngenec yofi deduae, neneng ngenec angkecdimbe, ifi isoc

---

\* **6:7:** Foininau, imocac yofi nengandae, imocngo kucgoc ewebesonga. † **6:7:** Kanau, imocac yofi negengandae, imoc garengemenideac dzikac wiac amma kaso isoc ua mebeso.

ngeneng ifingoc ubaherengina hafoangoc neneac angemebesos.

<sup>14</sup> Dindingac kekec nga singyoac kpekpe yeri yoac dedzege naric mi anecde. Nga kperagi nga kundung yeri uba mocgu naric mi anecde. Imocac ngeni ngicngac goa negen negensingngina kpac, yenigoc yoac dedzege mi ambisia.

<sup>15</sup> Kristongo Beriagoc‡ uba mocgu naric mi anude. Nga ngicngac negen negensingngoc yeni ngicngac negen negensingngina kpac, yenigoc negen negengngina mocgungoc naric mi anggecde.

<sup>16</sup> Negenggec, Anutuac womong nga nemuonga botucngirau yoac dedzege naric mi feude. Imoc yofiac, nenang Anutu kekehagoc, yeac womong. Anutungo imocac yofi deec,

“Ni amagerecna yenearu mema yenigoc kecbade.

Kecma yeneac Anutu amba yeneng ngicngacfocna anggecde.” (*Sesememe 26:12; Yeremaia 32:38; Edzekie 37:27*)

<sup>17</sup> Imocac amma, “Kebungo yofi dede,

‘Ngeni yeneac botucfunac meickema wayunuma tembucngina kecma wiac mong wonongagoc mekpesere mi ambisia. Ngeni ifi anggecdeu neng hoangngunuma negengngemmede. (*Yesaia 52:11; Edzekie 20:24,41*)

<sup>18</sup> Amma ni ngeneac Mangngina nga ngeneng neac naroang medacfocna anggecde, KEBU Kuctoa Minginango ifi dede.’ ” (*2 Samue 7:14*)

---

‡ **6:15:** Beria imoc Satanggac kpara mong.



## 7

<sup>1</sup> Songo tosofocna, Anutungo botucninau kefudeac deseriec, imocac nenang wiac sasawa ongaasunina nga ubasebinina heidzadzu kpekecde, imoc dzuacmengere amma kongaha ambisina. Amma Anutu eweheiheigoc hoanggekecma kpetiac kekec kecnideac ua hanaheing, imoc mesidacma yadiseri ambisina.

<sup>2</sup> Ngeni ubaherengina meyadima hafoangoc hoannunubisia. Neni ngic me ngac mong faka mangana mi ammiing. Amma wiacngina mong ikocfu mi wangepgunuing.

<sup>3</sup> Ngeni manganaac areng kecdae, imoc mi debade, kpac. Ngeni neneac heremanau kecdae, imoc bic edengunuai amma homenide me kecnide, imoc sasawa nenahafoc andacnide.

<sup>4</sup> Ni ubaherenango hoangngunuma ngeniac negemba ngereema engena ande. Amma neni ebic hania hania witiau kecmina ngeneng nanggenunugec, imocac ubangerec ebirangoc negenduae.

<sup>5</sup> Foracngoc, neni Makedonia bangecfu kensikeni ebic hania hania fingeenemmeu tacyacnina gombunga mong mi fingerec. Sebiugeng ngicngac yeni yoacsisic hania hania amma ngaba anemmegec ubahereninau kengecgoc kefing.

<sup>6</sup> Nga Anutungo ngicngac ubaebicgoc kecgoc meseriyunuande, yeng Tito sueu nenearu hau imocngo meserininuec.

<sup>7</sup> Amma Tito haec, imocsac kpac, ngeneng dafiu demeseri ammigec, yeng yocac imoc edenunuu ubangerec negening. Amma ngeni nenggecdeac songongina ande nga kpebungac ebicac amma

ubamangang andae amma ngeni dafiu neac songotoa negendae, ye imoc momoc edenunuu ubangerectoa negenai.

<sup>8</sup> Kibina warac ohoai, imocngo ubamangang meficgengemmeec. Ni imoc negemma naso we-genanecsac negengyohoc amma ubanango waec, yofinenggac ine ubanango mi wade.

<sup>9</sup> Neng ngeneac ubangerec negemma sogaid-uae. Imoc yofiac, ngeni ubahodungsac negembau imoc mi sogai bai. Nga ngeneng ubamangang negemma ubamereng anggec. Ngeni Anutuac songo nga negen negeng modacma ubamereng anggec. Ifi anggecac yofinenggac kibininaac amma ebicngina fingerecmoc, imoc bic kpac anec.

<sup>10</sup> Anutungo ubamangang meficgengemmeu imocac ubanginango mi wabisia, kpac. Imocngo ine ubamereng meficgengemmeu komoc kpegecde. Bangecac ubamangang, imocngo ine homec meficgengemmeude.

<sup>11</sup> Anutungo ubamangang ifia meficgengemmeu imocngo ngenearu fora yofi fingecegemmeec, ngeni serima namma kopocsicfakaac kengecngunuu imoc kpebungnginaunac meickegecdeac dema ngicngac demeting ayemmegec kekecngina hafoangoc kongaha fingeru hengkecdimbe.

<sup>12</sup> Ni warac kibi ohongemmeai, imoc ngic mongngo ogea memanganeecc me mangana ammiec, kibi imoc yereac amma mi ohoai, kpac. Ngeni Anutuac kicfu dafiu heresongogoc hoannunuandae, imoc fingectegeru ngenaocngoc imoc henghomegecdeac amma ifi ohongemmeai.

<sup>13</sup> Imocac amma memeseri meing. Mema torokpema yofi negening, ngeni sasawango Tito ongaasuya menomanema kuc gboria meficgemigec. Neni imoc negemma sogac sogai ebirangoc meficgeni imocngo meserinunuec.

<sup>14</sup> Ni Titoac kicfu ngeni dengerengunuma yofi edeai, ye ngenearu hama ngenenu nearu game mong mi fingerec. Neni ngenearu hama yoacnina sasawa imoc fora deing, ifi isoc Titoac kicfu dengerengununi fora fingerec.

<sup>15</sup> Yeng ngeneac negemma ubeango songo-toagoc hoangngunuude. Ye ngenearu hau ngeni dafiu ama heimima kengecngunuu eweheimima yoara tofohogec, ye imoc mi nigeckpeec.

<sup>16</sup> Ngeni serima kecdaeac negengyohocna kpac ubangerec negemma kecduae.

## 8

<sup>1</sup> Tosofocna, Anutungo Makedonia kpebung tackendae, yeni wosoefac dafiu ayemmeec, imoc edengunubesonga negendimbe.

<sup>2</sup> Imoc yofiac, yeni makpekpea kecma ebic witiau kpendzeng kpema sifu kpebung kpetiac Yerusarennu kecdae, yeneac ubangerec negemma wosoefac amma sese ebirangoc faigec.

<sup>3</sup> Yeni wiac feyemmeec soha faigec. Nga neng hepucngina amba yeni imoc ifingoc ferahagec. Yeni yenaocngoc ifi arenggema anggec.

<sup>4</sup> Yeni serima deigoc anemmema yofi degec, “Neni ifingoc ubangerec faka torokpema Yerusareng kpebung meficyununideac negendimbe.”

<sup>5</sup> ifi degec kpetea mong hanahema negensima faiing. Faini yeni imoc ferahama faigec. Ferahama torokpema Anutuac negen negeng nga songo modacma yenaoc Kebuac mariu faiemegec. Ifi faiemema nenearu torokpema ifingoc faiemegec.

<sup>6</sup> Ifi anggec, Tito ye ubangerec sese imoc faigecdeac ua ngenearu hanaheec, ye imoc mesiudeac deserima edeing.

<sup>7</sup> Ngenearu wiac sasawa ebirangoc fede, imoc yofi, negen negensing nga enac dedengina fengemme. Amma negen negentegec nga uac songo amma neneac heresongotoa fengemme. Ifi femanu ngeni ifingoc Yerusarenggac ubangerec sese ebirangoc naric faigecde.

<sup>8</sup> Ni yoc yomoc dedeseriyoacac siricfu mi edengunuduae, kpac. Goa yeni ua imohai faiemegecdeac songotoangina fede. Anu ngeni ngicngac hoangyunuma yeneac heresongo fora negendae me kpac imocac faitobannu faingunuduae.

<sup>9</sup> Ngeni Kebunina Yesu Kristoac wosoefac negendae. Ye kurumennu finactoayagoc kecma ngenac amma finaha wadacma makpekpea amma kefec. Yeng makpekpea anecac ngeni kurumenggac finactoanginagoc anggec.

<sup>10</sup> Anu ngeni sese faigecdeac neac negen negeng torokpeba imocngo meficngunubeso. Ngeni kifa bageau ua imoc megecdeac negemma bic deserima waraima ua imoc bic hanahegec.

<sup>11</sup> Ngeni hanac hanaheau efaima ua imoc heresongogoc megec, ifi isocngoc mamangkima

yofinenggac uangina mesibisia.

<sup>12</sup> Nga ngeni efaima kucngina fengemmedesoc sese faigec, imoc Anutuac kicfu ngereede. Nga kucngina mi fengemmedeu imoc yoara kpac.

<sup>13</sup> Ngicngac goa yeni ebicngina kpac kecgecde nga ngeni ebicngoc kecgecde, faka ifia mi ngereede, kpac. Ngeni siricngina mocgu amma kecgecdeac deduae.

<sup>14</sup> Ifiac amma naso yofinenggac ngenearu wiac homac fede, imocac nobohango ngicngac wiac monggac obohoda, yeni meficynuude. Anu ngade kecma ngeneng wiac monggac obohogece, imohai yenearu wiac homac feude, imocngo ngeni ifingoc meficngunuude. Ngeni ifi amma siric mocgu kecgecde.

<sup>15</sup> Imocac yofi oho ohoya fede,  
 “Ngc wiac homac meec, yeng semengtoagoc mi  
 anec nga efeanec meec, yeng wiac mong mi  
 hoforec.” *(Makekeng 16:18)*

<sup>16</sup> Anu neni ngenearu ubangerec goc ua meandimbe, ifi isocngoc Anutungo Titoac ubea midiu ye ngenearu uaya ubangerec goc mekefec, imocac Anutu dengereduae.

<sup>17</sup> Ye ngenearu ua meudeac ubea bic faiu meserimini yeng songotoa negemma ngenearu haec.

<sup>18</sup> Anu tosonina mong, ye siduc gombung deu kpebung sasawa fekenda, yeni yeac negenggec ngereeande, ye Titogoc sueni yerahafoc haecde.

<sup>19</sup> Kebungo kpac kuneng meudeac negemma neni Yerusarenggac ubangerec sese garenggekecdimbe. Kpebung yeneng ngic imoc meisinggec yeng nenigoc sese Yerusarennu mekennide.

<sup>20</sup> Nga hiedzo imoc dafi garenggekecdimbe, ngic mongngo imocac ngadeyoac debacac neni nena-hafoc mekennideac songonina ande.

<sup>21</sup> Kebuac kicfu nga ngicngac yeneac kicfu momoc faka dindingac anni ngereeude.

<sup>22</sup> Nga neni tosonina mong yerigoc sueyununi kenggecde. Ngic imoc ye ua hania haniaac songo-toa negengande, neni naso homac imoc henni ubanina ngereec. Yeng ngeneac negenu engena ande.

<sup>23</sup> Anu ni Titoac yofi deba negenggec, ye ua ogona anu neri ngenearu hade nenahafoc ua me-andimbe. Nga ngihoc yeri kpebunggac aposoro kecma uangirau Kristoac kpac miacandape.

<sup>24</sup> Imocac ngeni kpebung kicnginau songongina edzacyunuma heresongogoc hoangyunubisia. Ifiac amma neneng ngeneac negemma dedengerecyoac deing, imocngo ikoc mi ambeso.

## 9

<sup>1-2</sup> Ni kpetiac areng Yerusarennu kecdae, yeni meficyunugecdeac ohongemmeduae. Ngeni ua imoc megecdeac bic efaigec, imoc negenduaeac kibi yomohai yoac imoc naric wabaiacsoc. Nga Makedonia yeneac kicfu ngeneac yofi dengerengunuanduae, "Tosofocnina Akaia kecdae, yeni ua imoc megecdeac kifa bageaungoc bic efaigec."\* Anu ngeneng wiac yemmeyemmeac wosoefac meficgegec yeneng ngeneac siduc imoc negemma herengina yaru yeni ifingoc ambesonga negensigec.

---

\* **9:1-2:** Korinti taong imoc Akaia prowinsiu feec.

<sup>3</sup> Anu neneng dengerenguning, imocngo fora kpac ambacac tosofocnina imoc sueyunuduae. Yoac bic deai, ngeni ifi isoc memefic anggedeac efaima kecbisia.

<sup>4</sup> Anu kecma habeso deba Makedonia ngic goango nigoc hagec ngeni ua imohai mi efaigecdeu imoc ngenenggec neni nga ngeni momoc gamekpekpe ambinggac.

<sup>5</sup> Imocac amma neng tosofocnina edeyunuba yeneng warainemma hama kembisia, ifi negenduae. Yeni hama meficngunugec ngeneng ubangerecac wiac faigec kenudeac bic deserigec, imoc mengerema kpedzucne fai ambisia. Nga ngeni ubaebiha kpac ubangerecgoc sesengina faigecdeac tosofocnina sueyununi hadae.

<sup>6</sup> Ngic mong ye yaka efeanec semeng uau homerude, yeng fora efeanec sac meficgeude. Nga mong ye yaka ebira homerude, yeng fora ebirangoc meficgeude, ngeni imoc negensibisia.

<sup>7</sup> Mong ye ubangerecgoc ngicngac wiac yem-meu Anutungo yeac heresongo negenude. Imocac ngeni negengyohocfu me ngicngac goa yeneac hodzinu wiac ngicngac yemmegecde, imocngo mi ngereeude. Ngeni ine tembus tembus ubanginau wiac mong bic negenserigec, imoc yemmebisia.

<sup>8</sup> Ifi anggec kpekpedzuc ua gombunga hania hania fingeru Anutungo meficngunukefu wiac fengemmekefude nga ngeni nasosoc imohai wiac homac faigecdeacsoc anggede. Anutungo nenesemengngina nga dzongina keneheu wiacngina ebirangoc nasosoc fekefude. Ifiac amma ngeni sesenasou sasawango sesengina naric faigecde.

<sup>9</sup> Imocac yofi oho ohoya fede,  
 “Ye songea modacma wiac mederema ngicngac  
 makpekpea yemmeude. Yeac faka dindin-  
 gac, imoc nasoya nasoya feengkefude.” (*Mi-  
 tiyegec 112:9*)

<sup>10</sup> Anutungo komoc meficgeu ua mingina ye  
 imoc homerude. Amma semenga ifi miande, yeng  
 ngeneac komoc ifingoc meficgema semengngina  
 ebirangoc mesaheude. Nga ngeneac fakangina  
 dindingac, imocac fora torokpeu torokpe homac  
 amma kenude.

<sup>11</sup> Ngeni wiac hendzicma ngicngac ebic ha-  
 nia hania fingecyemmeu yeni ubangerecgoc wiac  
 yemmegecdeac amma ngeneac wiacngina homac  
 fingerude. Ifi anu neni ubangerecac wiac imoc  
 ngicngac yemmeni yeni Anutu dengeregecde.

<sup>12</sup> Ngeneng memefic ua imoc mema, imocngo  
 kpetiac areng wiac monggac obohoda, yeni  
 meficyunugecde. Imocngo sebinginasac mi  
 meficgeude, kpac. Imoc ifingoc Anutuaru  
 dedengerec ebirangoc meficgeude.

<sup>13</sup> Ngeni memefiac ua imoc memagec  
 Yerusareng kpebung yeni enac tofoc tofohongina  
 henggecde. Ifi henggec ngeni Kristoac siduc  
 gombung hoanggema yenigoc nga ngicngac  
 sasawa yenigoc haring meandae, yeni imoc  
 negemma Anutu dengeregecde.

<sup>14</sup> Nga Anutuac wosoefac ebirangoc ngenearu  
 fedecac yeni ngeneac amma numugecde nga uba-  
 herenginango ngeneac angkecde.

<sup>15</sup> Anutungo wosoefacfu wiac nemmeande imoc  
 wiac engena anu imoc yoacngo dafi debesonga  
 obohodimbe. Neni dengereni.



## 10

<sup>1-2</sup> Ngicngac goango neac yofi deandae, “Paurongo nenanggoc yei kecma yoara yumea deande amma hereau kecma yoac seria kengeha kpac edenunuande.” Ni ngenearu haba ngic goa neac yofi deandae, “Pauro ye bangecac faka modacma uaya mekecde.” imoc yenearu yoac seria kengeha kpac naric debade. Kristo ye yumea nga ubae-facgoc nga sing imoc modacma faka angemebadeac anende. Nga ngeni imoc wama neng kengeha kpac yoac seria edengunubadeac mi igocnubisia.

<sup>3</sup> Neni bangecfu kecdimbe, fora. Amma dzikac kpekecma bangecac faka mi modacnide, kpac.

<sup>4</sup> Tebe mariku dzikacac wiac mekecdimbe, imoc bangecfunac kpac. Imoc Anutuarunac amma imoc kuhagoc anu neneng imoc mema manganaac odasongngina hembarackema negen negengngina ikoha meickenide.

<sup>5</sup> Faka nga negen negeng engena sasawango Anutuac negen negeng keme kemea imoc kpekecde, neni imoc momoc meickenide. Meickema negen negeng sasawa kpehafoima dzegema Kristoac enac tofoc tofohoac bageau fainide.

<sup>6</sup> Nga geneac enac tofoc tofohongo hafoangoc fingeru yoackpekpe sasawa imocac turunga kpounideac efaima kecdimbe.

<sup>7</sup> Anu ngic mongngo deudeu, “Ni Kristoac ngic.” Ye yengenaoc imoc negengemeu, neni ye isocngoc Kristoac ngic kecdimbe. Ye ifingoc yengenaoc negengemebeso. Mongngo ifi negemmanu fakanina imoc yearu ireckeude.

<sup>8</sup> Kebungo kuc nemmeec, imoc ngeni memanganengunuideac mi nemmeec, kpac. Ye meseringunuideac kuc nemmeec. Ni kucna imocacsoc fede nga imoc negemba engena ande. Imocac amma gamekpekpeu mi fainugecde.

<sup>9</sup> Amma kibi ohongemmeanduae, imocngo kengehagoc fingerudeac mi negenganduae.

<sup>10</sup> Nga ngic goa yeneng deandae, “Pauroac kibi imoc yoac seria nga kuhagoc, fora. Anu ye hama nenangoc kecma ine sebiugeng kucmamayagoc kecma yoac deu ngicngac yeni imoc ngadehema wagecde.”

<sup>11</sup> Ngicngac ifi deandae, yeni yofi negentegecbisia, neni hereau kecma yoac kibiuhongemmeandimbe nga hama ngenigoc kecma angammemenina, imocngo siriha mocgu angkecdimbe.

<sup>12</sup> Ngic goa yeneng ine yofi deandae, “Merang botucninau kuneng kecde?” yeni imoc denegeng amma isinggeandae. Ngic ifia yeni wiac mong mi negentegecma sing segegecde. Neni yenigoc namma merang nenangaru engena kecde, imoc naric mi debing.

<sup>13</sup> Anutungo meisinnunuma uayoac nemmeu neni imoc modacma ngenearu ifingoc sikeing. Nga ma imoc ferahama sebinina naric mi meenide.

<sup>14</sup> Neni ngenearu hama Kristoac siduc gombung edenguning. Ngenearu mi habinnu uaninaac yoaciduc imocngo sebiengeng ambac.

<sup>15</sup> Nga ngic goa yeneng ua bic megec, neni ihai kemma kiwa amma engena annideac negemma mong mi meandimbe, kpac. Neni yofi ne-

gendimbe, ngeneac negen negensingngo yadiseri anu neneac ua ngenearu ifingoc yadiseri anude.

<sup>16</sup> Nga ngeneng yadiseri anggec neni ngeneac ngadeau bangec goa fekende, ihai ifingoc kemma siduc gombung dekperagiyemmenide. Ifi amma imohai ngic monggac uaac kiwa mi annide.

<sup>17</sup> Nga mong ye yengenaac negenu engena angkecde, yeng KEBUAC negenu wiac engena anu sogaibeso. *(Yeremaia 9:24)*

<sup>18</sup> Anutungo ngic mong nanggeu ua meude, imocngo ngereeu. Nga mong ye yengena kuha nanggeemema ua meude, imoc naric mi ngereeu.

## 11

<sup>1</sup> Ni yoc mong mereng kpereng deba modzongina mi tibeso.

<sup>2</sup> Anutungo herea gerec dzeande, ifi isoc ni ngeneac amma herena dzema kecde. Imoc yofiac, ngac mong ye ngic bingeha bic demigec kecande, neng ifi isoc Kristoaru enembingec kongaha faingunubadeac negensiduae.

<sup>3</sup> Ngeneng Kristo hoanggema kongaha kecma heregoc yeac songo negendae. Nga boidzocngo Ewa ikoc ammima tobanggeec, ngic mongngo ifi isoc kekecngina kongaha nga Kristoac songo imocac negen negeng wangepngunubacac kengec-nude.

<sup>4</sup> Ni fakangina mong henganduae, imoc ine naric mi ande. Neneng Yesuac siduc dekperagingemmeing nga ngic mongngo hama imoc kpema Yesu siraha monggac dekperagingemmeu ngeni yeac yoc mi

isinggema engsac ubangerec negemma meandae. Faka imoc naric mi ande. Ngeni Asu bic megec, imoc wama asu siriha mong ngic yenearunac ubangerecgoc meandae. Nga neneng siduc gombang dekperagingemmeing, imoc kpema siduc gombang siriha mong deudeu ngeni imoc ifingoc mi isinggema engsac ubangerecgoc negemma megecde.

<sup>5</sup> Ni neanna yofi negenduae, aposoro ifia yeni sebingina meengandae nga ni yeneac mamea mi anduae, kpac.

<sup>6</sup> Yoaac dedeac kuc homac nearu mi fede, fora. Nga negen negentegec sifu soha fenende. Ngeni sing hania hania ngenearu bic fingeru henggec.

<sup>7</sup> Ni hiedzoac arennu siduc gombang mi dekperagingemmekefai. Ngeneng engena anggecdeac memaemeai, imocac negemba kopocsic mi ande.

<sup>8</sup> Anu ni ngenearu kingang ua mebadeac kpebung goa yeni hiedzo nenggec meai, fora. Nga ngenearunac ine hiedzo mong mi meai, kpac.

<sup>9</sup> Amma ni ngenigoc kecma wiac monggac obohoma ngenearunac mong ebicna mi miai, kpac. Tosofocnina Makedonia prowins, ihacnac hagec, yeni ine wiac obohoi, imoc sasawangoc meficnudacgec. Ifi anggec ni garengemema ebic mong mi ngemmeai amma mong mi ngemmebade.

<sup>10</sup> Nga Kristoac yoaac forau kecduaeac ngicngac Akaia bangecfu kecdae, yeneng dedengerecna imoc naric mi meickegecde.

<sup>11</sup> Ni heregoc ngeneac songo negenduaeac ebic mong ngemmebeso mi anende. Neng ifi hoangngunuma ngeneac heresongo negenduae, Anutungo imoc negende.

<sup>12</sup> Ngic goa wangepngunuandae, yeni nenigoc soc mocgu ambeso amma sebingina ifingoc meembeso anggecde. Yeni ifi anggecdeac ni imoc kpae heima hiedzoac faka damoc anganduae, imoc engngoc amma kecbade.

<sup>13</sup> Nga ngic ifia yeni aposoro ikoc amma ongeasac mekecma ua fora mi mema siricngina heimerenggec Kristoac aposoro siric isoc angkecdae.

<sup>14</sup> Faka ifi anggecac ngeni mi kpidohobisia. Satang ye ifingoc yengena siriha heimerenu kperagiac angero, ifi isoc angande.

<sup>15</sup> Ifi ammanu yeac kingangkpekpefora yeneng ifingoc siricngina heimeremma faka dindingacac ua ngic, ifi isoc anggecde nga imocngo wiac engena mi ande. Amma yeni ine kecma wisic wisick-eau angammemenginaac turunga megecde.

<sup>16</sup> Anu ngeni neac yofi mi negembisia, “Ye ubea sufude.” imoc monggoc edengunuduae. Amma ngeni neac ifia negendaeu ngeni sifu ngic ifia dema hoannubisia. Ifi anu neng ifingoc neanna kpacna miacma yoac kapianec debade.

<sup>17</sup> Amma yoac yomoc deduae, imoc Kebuac enac modacma mi deduae, imoc ine ubasufuyoac isoc neannaoc dema kpacna miacma deduae.

<sup>18</sup> Ngic homac yeneng bangecac negen negeng modacma yenang kpacngina miacgecdeac yoac deandae. Imocac amma ni ifingoc neanna kpacna miacma yoac goa debadeac negenduae.

<sup>19</sup> Nga ngeni ngenaoc negen negentegecningoc kecdimbe negendae, ngeni ubasufuyoacac songo negendae, imoc hemma kecduae.

<sup>20</sup> Ngic goa yeni wanac mengunuma iwaingina wangepngunuma kpekpe patang angemema kpacngina meenggede. Ifi angkecgec ngeni imoc hemma ngeni kpae mong mi heiyemmeandae, kpac.

<sup>21</sup> Ifi anggec gamenuu yoac yofi deduae, nen-earu kucfaka ifia mong mi fede, ifi ambing dede imoc nenenggec gameagoc ambac.

Nga ngic goa yeneng kengecngina kpac kecma kpacngina miacandae, ni ifi isocngoc kengeha kpac ubasufuyoac dema kpacna miacba negenggec.

<sup>22</sup> Yeni hebiraio ngic, fora. Nga ni ifingoc hebi-raio ngic. Yeni Israe ngic nga neng ifingoc israe ngic. Yeni Abarahanggac bangecfora amma ni ifingoc yeac bangec anduaengoc.

<sup>23</sup> Nga yeni Kristoac kingangkpekpefora andae nga neng imocac engena anduae. Amma mong-goc ubasufuyoac isoc deduae. Ni Kristoac ua feracyunuma mekecduae. Ifi feracyunuba ngaba yeneng naso homac witicamau fainugec tarai. Tacha yeneng naso homac dzikacngo ebirangoc nugec nga naso homac homecfu heima kefai.

<sup>24</sup> Yudangic yeneng dzikacngo nugec, imoc atac faif anec. Amma nugec, imoc kpetea 40 imohac-nac mocgusac meickegec.

<sup>25</sup> Nga naso harebec kocbing kiai amma naso mocgu hocngo neregec. Nga naso harebec wageu kenni dokungo wageu wakeu kemeing. Amma naso monnu hadzing tofocnac mocgu kondung witiau kefai.

<sup>26</sup> Ni naso homac bangeha bangeha yerecgekecma dokutoau manganebeso anai. Nga

godzungic yeneng sinnu memanganenubeso anggec amma neanna arengfocna yeneng memanganenubeso anggec nga bangeha bangeha ngic Anutu mi negemmidae, yeneng memanganenubeso anggec. Nga taong goau ngic yeneng memanganenubeso anggec. Anu bangec kisiu nga kondunnu kecma ebic meficgeai. Amma ngic goa ikoc amma yofi degec, “Neni ifingoc negen negensingoc kecdimbe.” yeneng tosonina dema memanganenubeso anggec.

<sup>27</sup> Ifi anenggec sifu ua esa kpendzengoc mekefai. Mekecna naso homac gaugbori kecma nenedoku hoforai nga naso homac wambaac osima tentennuu kefai.

<sup>28</sup> Anu ebic imocsac kpac, ni ifingoc wenacsoc kpebung sasawa garengyunubadeac negemma ua ebira mekecduae.

<sup>29</sup> Kpebung yeneacunac ngic mongngo kuha kpac anu neng ifingoc ubaebic mebade. Nga yeneacunac mongngo kopocsicfu makpeu yeac ebic imocngo hembra herenau gerec isoc dzeude.

<sup>30</sup> Nga kpacna miacbeso dema kucmamanaac negemma miacbade.

<sup>31</sup> Ni ikoc mong mi deduae, imoc Yesu Kristoac Anutu nga Manggacngo negende. Ye wisic wisickea kpac nasosoc dengerebesonga.

<sup>32</sup> Ni Damasko taonnu kecbare ngictau Aretaac gawanango mendannuudeac taonnu garengfora faiyunuec.

<sup>33</sup> Faiyunuu tosofocna yeneng meficnuma uficfu barinuma taonggac odaac titinnusing fainugec oda ngadeau mama yeac mariunac worayai.

## 12

<sup>1</sup> Haniana goa torokpema deba, ni kicna te-geru wiac henai nga Kebungo wiac sufu sufuya dekperaginenec, imocngo ngeneac memeficngina mi ande gedang nga imoc sifu deduae.

<sup>2</sup> Ngic mong Kristogoc kpeketahema kecde, ye negenduae, ye kurumeng kpetea harebec, imohai kpedzigec enu yaguc kifaya 14 ande. Amma ye sebigocngo enec me sebia wama enec, imoc ine mi negenduae, Anutungo imoc negende.

<sup>3</sup> Ni ngic imoc negemmiyombonggeduae. Amma yeng sebiagoc me sebia kpac enec imoc mi negenduae, Anutungo negende.

<sup>4</sup> Ngic imoc ye kpedzigec emma eucererennu kemma yoc goa ngicngo dedeac soha kpac, imoc kpaeyagoc nga dedeasoc mi ande, imoc hen-nengeng anec. Imoc ni.

<sup>5</sup> Ni ngic imocac negemba engena ande. Ni neanna mi miacemeduae, kpac. Ni kucma-manaacsac negemma haniana ifi dekperagiduae.

<sup>6</sup> Ni neanna miacemebadeac songona ambac imoc ubasufuyoac mi anu yoc fora debade. Amma ngic yeneng nengandae me siducna nengengandae, yeni imoc ferahema dengerenubauac neanna miacemebadeac waduae.

<sup>7</sup> Kicna tegeru wiac sufu sufuya engena yombong henai, imoc negemma neanna miacemebaiac Anutungo wae mong sebinau faiec fede, imoc Satanggac angero mongngo dzikacngo nuande.

<sup>8</sup> Nuu waengo sebinanunac meickeudeac Kebu numumiba atac harebec bic anu



<sup>9</sup> Kebungo yofi edenuec, “Neac wosoefacngo ge socguude. Nocac kucnango kucmama imocac kekecfu hafoangoc fingectegerude.” ifi deecac yofi negenduae, Kristoac kucngo kperacnuudeac kucmamana dekperagibade.

<sup>10</sup> Anu ni ubahodung negemma ebicfu nga kucmama kecba defagoc anemma nukporac anengandae, ifi anenggec Kristoac amma sogaianduae. Ni kucmamagoc kecma imohainoc kucnagoc anduae.

<sup>11</sup> Ngeneng igocnugecac amma ngic kapaya isoc anduae. Ngeni ine ngenaoc dengerenubau imoc ngereebac. Imoc yofiac, ni mameanec kecbare sifu ngic aposoro engenatoa deandae, imoc yeneac mamea mong mi kecduae.

<sup>12</sup> Ni ngeneac botucfu uana serima mekecba ngeni negensinggegedeac kucfaka hania hania nga faka mi hehena fingecngemmeu aposoro yeneac ma imoc uanau fingectegeru henggec.

<sup>13</sup> Amma kpebung goa yeneac botucfu sing modarai, imoc ifingoc ngenigoc kecma modarai. Wiac mocgusac fede, ni dzofinacac arennu ebic mong mi meficngemmeai. Imoc henggec kopocsic andeu ngeni kopocsicna imoc wabisia.

<sup>14</sup> Ngenearu monggoc habadeac efaiduae, imocngo atac harebec anude. Hama sebiac memefiac ebic mi ngemmecade. Nambarac yeneng nonggo mang yeneac wiac mi mekpedzuc anggecde, kpac. Nonggo mang yeneng ine nambaracfcngina yeneac wiac mekpedzuc anggecde. Imocac dzofinacngina mebadeac mi habade, kpac. Ni ngenangac amma habade.

<sup>15</sup> Amma ngeneng kekecngina ngereuedeac amma dzofinac fenende, imoc ubangerec goc naric meficngunuma faingemmebade. Nga imocsac kpac, ni ifingoc neanna kekec hafoangoc ngeneac amma naric wabade. Ni ngeneac heresongotoa negenduae, imocac ngeni ifingoc neac songo kapia naric negembisia.

<sup>16</sup> Ni ebic mong mi meficgengemmeai, ngeni imoc yagucnoc negendae. Nga dekerecfu me ikocfu wiacngina mong mi wangepgunuai.

<sup>17</sup> Amma ngic sueyubaba hagec, yeneng neac negensima wiac mong mi wangepgunugec, kpac.

<sup>18</sup> Amma neng Tito ngenearu haudeac edema yegoc tosonina mong sueyuruba haoc. Hama Titongo ifingoc wiac mong mi wangepgunuec. Neri Asu mocgu nerahafoc modacemema hanititira mocgunoc tima kecdipe.

<sup>19</sup> Neni ngenearu hama hanianina dema ngeniac kicfu mengereemenideac dedae, ngeni imoc mi negensibisia. Tosofocna, neni ine Kristogoc kpeketahema kecma Anutuac kicfu yoac denide. Ngeni nanggengununi yadiseri anggecdeac ua sawa menide.

<sup>20</sup> Ni ngenearu hama ngenemba ngeni neac songo mi modacgecde nga ngeneng ifingoc neac mi angemmeude, imocac kengecnude. Ngeni gubekisang kecma enacfu faifai amma yoacngina deendema keracmangang nga herebu angemmema sebingina meemma yoackpepegoc kecma uba mocgu mi kecandae, ngeni siringina ifia hembaiac kengecnude.

<sup>21</sup> Nga haba ngicngac homac ngenearunac kopocsic meficgema faka wonongagoc nga sero

faka mekecma sicsauc kekec mong mi wagec, imoc hemma kiac ubamangang amba Anutungo ngeneac kicfu memanubacac kengecnude.

## 13

<sup>1</sup> Ni monggoc ngenearu habeso negenduae, imoc haba nasona harebec anude. Yoac yofi oho ohoya fede,

“Ngic yohockang me harebec yoacngina mocgu anudeu ngeni kopocsicmeme yoara naric isinggema foraya degecde.” *(Dedeseri 19:15)*

<sup>2</sup> Anu ni naso dzongiau hama kopocsicmeme nga kpebungtoa ngeni gorongina kpema yoac edengunuai. Nga yaguc ngenigoc tacbai ifi isoc yoac imoc hereau kecma monggoc ohongemme-duae. Ifiac amma ni monggoc ngenearu dzi-gene habade, imohai ngicngac goa ngeni kopoc-sicfunac ubamereng mi anggec, ngeni demeting seria angemmebade.

<sup>3</sup> Kristo ye ngenearu uaya kucmamaya kpac, yeng ua kuhagoc meande. Nga enacnau yoara deanduae me kpac imocac kpesi kpesi ngenearunac haec. Ni dzigene hama demeting angemmeba yeac kucfu yoara deanduae, imoc negentegecgecde.

<sup>4</sup> Ngic yeneng ye gagabuu mariponnu kpegec homeec. Homeu Anutungo ye nanggeu yacma yaguc yeac kucfu kecde. Neni yegoc torokpema kucmama kecma yearu kpeketaheni Anutungo nanggenunuu yeac kucfu ngenearu ua menide.

<sup>5</sup> Nga ngeni negen negensinggoc kecdae me kpac, imocac ngenaoc tembus tembus tobangemema isingemebisia. Nga Yesu Kristongo ubaheregau mi kecdeu ge faitobannu makpenade, imoc negentegechesena.

<sup>6</sup> Nga neni faitobannu mi makpeing, ngeni imoc meficgegedeac negensiduae.

<sup>7</sup> Ngeni faka nga angammeme gombunga angkecma kopocsic mong mi meficgegede, imoc Anutu numumikecdimbe. Neni ngicngac yeneng dengerenunugecdeac ngeneac mi numuandimbe, imocac goa yeneng neneac negemmanganeandae.

<sup>8</sup> Neni yoac nga faka fora naric mi kpenide, neni yoac nga faka fora nanggenide.

<sup>9</sup> Neni kucmama kecmina ngeneng kucnginagoc kecgec ubangerec negendimbe. Nga ngeni Kristoac kpeteu yadiseri anggecdeac ifingoc numukecdimbe.

<sup>10</sup> Anutungo uayoac nenu ni ngicngac negen negensinggoc yadiseri anggecdeac ua mekecduae. Nga memanganangunubadeac mong mi deec, kpac. Imocac ni hereau kecma ngeneac kibi yomoc ohoduae. Kecma ngenearu habade, imohai demeting yoac seria naric wabade.

<sup>11</sup> Negen negensinggoc tosofocna, ni yoac desima yofi deduae, ngeni ubangerecgoc kecma mengereemema meseriemema ruae meficgema uba mocgu kecbisia. Ifi anggec Anutu, songo nga ruae minginango, ngenigoc kefude.

<sup>12</sup> Ngeni wenacngerec angemema titikokoc kpetiac angemebisia. Ngicngac kpetiac sasawa yeneng wenacngerecngina suegec ngenearu

hade.

<sup>13-14</sup> Kebunina Yesu Kristoac danggunuc nga Anutuac heresongogoc hoangemekekec amma Tiri Asugoc ureckekec, imocngo ngicngac sasawa ngenearu fekecheso.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

19b7c48c-f4ce-5007-838d-58f01dc01ecc